

der Stamm Manasse / Ir Heubtman Gamliel der son Pedasur / sein Heer an der summa zwey vnd dreissig tausent vnd zwey hundert. Da zu der stam Ben Jamin / Ir Heubtman Abidan der son Gideon / sein Heer an der summa / funff vnd dreissig tausent vnd vier hundert. Das alle / die ins lager Ephraim gehören seien an der summa / hundert vnd acht tausent vnd ein hundert / die zu seinem Heer gehören / Vnd sollen die dritten im ausziehen sein.

Gegen Mitternacht sol ligen das gezelt vnd panir Dan / mit irem Heer / Ir Heubtman Ahieser der son Amm Sadai / sein Heer an der summa / zwey vnd sechzig tausent vnd sieben hundert. Neben im sol sich lagern der stam Asser / Ir Heubtman Pagiel der son Ochan / sein Heer an der summa / ein vnd vierzig tausent vnd funff hundert. Da zu der stam Naphthali / Ir Heubtmann Ahira der son Enan / sein Heer an der summa / drey vnd funffzig tausent vnd vier hundert. Das alle / die ins Lager Dan gehören / seien an der summa hundert sieben vnd funffzig tausent vnd sechs hundert / Vnd sollen die letzten sein im ausziehen mit irem Panir.

Summa der Kinder Israel.

DAS ist die summa der kinder Israel nach irer Veter heuser vnd Lager mit iren Heeren / Sechs hundert tausent vnd drey tausent / funff hundert vnd funffzig. Aber die Leuten wurden nicht in die summa vnter die kinder Israel gezelt / wie der HERR Mose geboten hatte. Vnd die kinder Israel theten alles / wie der HERR Mose geboten hatte / vnd lagerten sich vnter ire Panir / vnd zogen aus / ein iglicher in seinem Geschlecht nach irer Veter haus.

III.

Aarons Sone. Exod. 6.



DIS ist das Geschlecht Aaron vnd Mose / zu der zeit / da der HERR mit Mose redet auff dem berge Sinai / vnd dis sind die namen der sone Aaron. Der Erstgeborne Nadab / darnach Abihu / Eleazar vnd Ithamar. Das sind die namen der sone Aaron / die zu Priester gesalbet waren vnd ire hende gefüllet zum Priesterthum. Aber Nadab vnd Abihu storben fur dem HERRN / das sie frembd Fewr opfferten fur dem HERRN in der wüsten Sinai / vnd hatten keine sone. Eleazar aber vnd Ithamar pflegten des Priesterampts vnter irem vater Aaron.

Leui. 10. 1. Par. 24.

Ampt der Leuten.

Vnd der HERR redet mit Mose vnd sprach / Bringe den stam Leui er zu / vnd stelle sie fur den Priester Aaron / das sie im dienen / vnd seiner vnd der ganzen Gemeine hut warten / für der Hütten des Stiffts / vnd dienen am dienst der Wohnung / vnd warten alles Gerets der Hütten des Stiffts / vnd der hut der kinder Israel / zu dienen am dienst der Wohnung. Vnd solt die Leuten Aaron vnd seinen sönen zuordnenen zum geschencck von den kindern Israel. Aaron aber vnd seine Sone soltu setzen / das sie ires Priesterthums warten / Wo ein Frembder sich erzu thut / Der sol sterben.

Num. 8.

Vnd der HERR redet mit Mose / vnd sprach / Sihe / Ich habe die Leuten genomen vnter den kindern Israel / fur alle Erstgeburt / die da mutter brechen vnter den kindern Israel / also / das die Leuten sollen mein sein. Denn die ersten Geburt sind mein / sint der zeit ich alle Erstgeburt schlug in Egypten land / da heiliget ich mir alle Erstgeburt in Israel / von Menschen an bis auff das Vieh / das sie mein sein sollen / Ich der HERR.

Exod. 13.

Kinder Leui.

Exod. 6.

Vnd der HERR redet mit Mose in der wüsten Sinai / vnd sprach / Sele die kinder Leui nach irer Veter heuser vnd geschlechten / alles was menschlich ist eins monden alt vnd drüber. Also zelet sie Mose nach dem wort des HERRN / wie er geboten hatte / Vnd waren dis die kinder Leui mit namen / Gerson / Kahath / Merari. Die namen aber der kinder Gerson in irem Geschlecht waren / Libni vnd Simei. Die kinder Kahath in irem Geschlecht waren / Amram / Jezehar / Hebrom vnd Uziel. Die kinder Merari in irem Geschlecht

U H schlecht